

tholicæ fidei propagatione, deque venerabilium Fratrum Episcoporum concordia, studio et curâ in pas-  
cendis ac regendis ovibus sibi commissis, divinoque cultu augendo, nobis allata sunt testimonia. Supra modum itaque lætitiâ perfundimur, ac Deo optimo maximo, bonorum omnium largitori, debitas persolvimus gratias, simulque preces supplicationesque nostras effundimus, ut qui cœpit opus bonum ipse perficiat, gaudiumque nostrum reddat plenum. Nos interea eorundem Antistitum postulationibus obsecundare, et Christifidelium utilitati, quantum nobis ex alto datum est, prospicere volentes, limites Diœcesum in memoratis regionibus existentium singillatim describendos putamus, ut Catholicæ Religionis negotia laudabilibus in dies possint proficere incrementis, ac de profectu sanctarum ovium haurientium aquas in gaudio de fontibus Salvatoris, fiat corona immarcescibilis Pastorum. Etenim ad aures nostras pervenit, ex plurium Sedium Episcopaliū erectione haud longo annorum decursu expletâ, ob magnum quod accepit orthodoxâ fides in Americâ Fœderatâ incrementum, vetusta Diœcesum confinia evasisse minùs accommodata vel incerta, proindeque ad omnem quoque dubitationis et anxietatis tollendam occasionem, quæ circa jurisdictionis Ecclesiasticæ exercitium, venerabiles Fratres Episcopos ac dilectos Filios Presbyteros in illâ vineæ Domini parte, tam naviter ac tam prosperè, adjuvante Domino, laborantes perturbare, et vinculum charitatis quo in Domino colliguntur abrumpere posset, esse omninò necessarium ut certi locorumque conditioni congruentes illarum Diœcesum limites per Apostolicam Sedem, quæ divinitus super omnes alias Ecclesias jurisdictionis obtinet primatum, statuatur et describantur.

Quapropter nos qui rem universam Congregationi Ven. Fratrum S. R. E. Cardinalium, negotiis Propagandæ Fidei præpositorum, expendendam commisimus, eorundem consilio adhærentes, atque etiam Episcoporum votis in Synodo Provinciali Baltimorensi mense Octobri superioris anni Millesimi octingentesimi trigesimi tertii congregatorum annuentes, ex certâ scientiâ, maturâ deliberatione, deque Apostolicæ potestatis plenitudine, ad Omnipotentis Dei gloriam, Deiparæ laudem, ac Fidei Catholicæ exaltationem, limites Diœcesum in Americâ Fœderatâ in hunc qui sequitur modum assignamus atque circumscribimus, eosque ab omnibus perpetuò ac inviolabiliter servari jubemus, atque mandamus, nimirum:

Archidiœcesis Baltimorensis complectetur totam Marylandiæ Provinciam cum Districtu fœderali Columbiæ. Archiepiscopus prætereâ Baltimorensis Episcopalem Sedem Richmondensem, donec aliter à S. Sede provideatur, Administratoris titulo, procurabit, atque hæc Diœcesis Virginiae Provinciam subjectam habebit.

Diœcesis Bostoniensis comprehendet sex Provincias quæ vulgò Nova Anglia nuncupantur, id est, *Massachusetts, Maine, New-Hampshire, Rhode-Island, Connecticut, Vermont.*

Diœcesis Novi Eboraci continebit Provinciam ejusdem nominis, atque etiam Comitatus in Provinciâ *New-Jersey* existentes, scilicet: *Sussex, Bergen, Morris, Essex, Somerset, Middlesex* et *Monmouth.*

Diœcesis Philadelphici constabit ex Provinciis Pennsylvaniae et *Delaware*, unâ cum sequentibus Comitatus in Provinciâ *New-Jersey*, hoc est: *Hunterdon, Warren, Burlington, Gloucester, Salem, Cumberland* et *Cape-May.*

Diœcesis Carolopolitana complectetur Provincias Carolinam Meridionalem, Carolinam Septentrionalem, et Georgiam.

Diœcesis Mobiliensis efformabitur ex Provinciis *Alabama* et *Floridarum*.

Diœcesis Novæ Aureliæ constituetur ex Provinciis *Luisianæ* et *Mississippi*.

Diœcesis Cincinnatensis continebit *Ohio* Provinciam.

Diœcesis Detroitensis comprehendet Territoria *Michigan*, et *Nord-Ouest*, seu *North-Western*.

Diœcesis Bardensis habebit Provincias *Kentucky* et *Tennessee*.

Diœcesis S. Ludovici complectetur Provinciam *Missouri*, unâ cum Territorio dicto *Arkansas*; et donec aliud à S. Sede statuatur, habebit quoque Territorium ad Occidentalem plagam fluminis *Mississippi*.

Diœcesis denique Vincennopolitana comprehendet Provinciam *Indianæ*, unâ cum parte *Illinois*, cujus reliqua pars Diœcesi S. Ludovici adjungetur, ita quidem ut utriusque Diœcesis limites in Provinciâ *Illinensi* statuatur hoc modo: Incipiendo à flumine *Ohio*, quod ad meridiem dividit *Kentucky* ab *Illinois*, et propriè ab Castello *Massæ* ducatur linea recta per fines orientales Comitatum *Johnson*, *Franklin*, *Jefferson*, *Marion*, *Fayette*, *Shelby* et *Macon*, usque ad magna fluentia fluminis *Illinois*, quæ sunt ad octo millia passuum supra oppidum *Ottawa* in Comitatu *Lasalle*, et hinc usque ad Septentrionalem Provinciæ finem, adeò ut pars Occidentalis lineæ Provinciæ *Illinensis* pertineat ad Diœcesim S. Ludovici, pars verò Orientalis ad Diœcesim Vincennopolitanam omninò spectet.

Itaque venerabili Fratri *JACOBO*, Archiepiscopo *Baltimorensi*, quem in præsentium litterarum exequutorem eligimus ac deputamus, per Apostolica scripta mandamus, ut ipse per se vel per alios viros Ecclesiasticâ dignitate insignitos, ab eo subdelegandos, hasce nostras litteras ubi et quando opus fuerit, ac quoties ab iis quorum interest, aut ab aliquo eorum fuerit requisitus, solemniter publicet et exequatur, ac omnia et singula in eis contenta faciat auctoritate nostrâ ab omnibus ad quos spectat, et pro tempore spectabit, inviolabiliter observari; atque ut tam ipse quàm personæ ab eo subdelegandæ, super quâcumque oppositione in actu exequutionis quomodolibet oriturâ, etiam definitivè et quâcumque appellatione remotâ, pronunciare liberè ac licitè possit atque valeat, contradictores quoslibet ac rebelles per sententias, censuras pœnasque Ecclesiasticas, aliaque juris et facti remedia compescendo, invocato etiam, si opus fuerit, auxilio brachii sæcularis, plenam et omnimodam facultatem concedimus atque largimur. Eidem verò Archiepiscopo *Baltimorensi* præcipimus ac mandamus, ut singulorum actorum in harum litterarum executione conficiendorum exemplar, authenticâ formâ exaratum, intra decem menses ab expletâ ipsarum exequutione ad hanc Apostolicam Sedem transmittat, illudque in Archivo Congregationis *Propagandæ Fidei* asservari volumus. Præsentes verò litteras semper ac perpetuò validas et efficaces existere ac fore, nulloque unquam tempore, subreptionis, obreptionis, aut nullitatis vitio, seu intentionis nostræ aliove quovis defectu, etiam ex eo quòd ii quorum interest seu interesse possit in futurum, cujusvis statûs, ordinis, præeminentiæ ac dignitatis sint, illis non consenserint, aut minimè vocati et

auditi fuerint, aut ex eo quòd solemnitates ac quæcumque alia forsan servanda minimè servata fuerint, impugnari aut in controversiam vocari posse; sed tanquàm ex Pontificiæ providentiæ officio ac motu proprio factas, omnimodâ firmitate existere suosque plenarios ac integros effectus sortiri, sicque ab omnibus censi; ac ita, et non aliàs per quoscumque iudices ordinarios vel delegatos quâvis auctoritate fulgentes, sublatâ eis et eorum cuilibet quâvis aliter iudicandi ac interpretandi facultate, iudicari et defini debere: et si secùs super his à quoquam, quâvis auctoritate, scienter vel ignoranter contigerit attentari, irritum ac inane decernimus, atque declaramus. Non obstantibus de jure quæsito non tollendo, aliisque Cancellariæ Apostolicæ regulis, nec non Apostolicis et Synodalibus Constitutionibus, ceterisque etiam speciali et individuâ mentione dignis, in contrarium præmissorum editis; quibus omnibus, hac vice dumtaxat, et ad præmissorum effectum, derogamus ac derogatum esse volumus.

Hujusmodi autem litterarum transumptis seu exemplis et impressis, manu Notarii publici subscriptis, ac sigillo personæ in Ecclesiasticâ dignitate constitutæ munitis, eandem ubique locorum, in iudicio et extra, fidem præberi volumus, quæ his præsentibus haberetur, si originaliter exhiberentur. Nulli ergo omninò hominum liceat hanc paginam nostræ circumscriptionis, assignationis, immutationis, concessionis, commissionis, mandati ac voluntatis, infringere, vel ei ausu temerario contraire. Si quis autem hoc attentare præsumpserit, indignationem Omnipotentis Dei, ac beatorum Petri et Pauli Apostolorum ejus, se noverit incursum.

Datum Romæ apud S. Petrum, anno Incarnationis Dominicæ millesimo octingentesimo trigesimo quarto, decimo quinto Kalendas Julias, Pontificatûs nostri anno quarto.

Loco † Plumbi.

Super quibus quidem litteris Ego Notarius Apostolicus præsens transumptum confeci et signavi, præsentibus DD. Germano et Damaso Testa testibus. Concordat cum Originali.

ALEXANDER MACIOTI, *Officialis deputatus.*  
B. CARD., *Pro-datarius.*

## DECRETUM

S. CONGREGATIONIS GENERALIS DE PROPAGANDA FIDE,  
DE METHODO SERVANDA IN EPISCOPORUM DIOECESUM  
FÆDERATARUM AMERICÆ SEPTENTRIONALIS PROVIN-  
CIARUM ELECTIONE.\*

CUM ad Religionis incrementum in Fœderatæ Americæ regionibus stabiliùs procurandum, imprimis conferat ut Episcoporum Diœcesum ibi statutarum electionis gravissimum negotium ritè sancteque absolvatur, S. Congregatio de Propagandâ Fide valdè opportunum esse ad hoc consequendum existimans ut certa methodus ubique in illis Diœcesibus servanda statuatur, quâ fiat ut Sedes Apostolica exploratam notitiam habere possit meritorum Sacerdotum pro quibus commendationes afferuntur, in generali Conventu die 18 Martii anno 1834 habito, referente Eñno

\* De hac methodo aliquid immutatum fuit per aliud Decretum, quod infra inter Acta Synodi Provincialis VII positum est.

et R<sup>m</sup>o D. JOSEPHO ANTONIO S. R. E. Cardinali SALA, censuit ac decrevit in eâ re esse servanda quæ sequuntur:

Cùm aliqua Sedes Episcopalis vacaverit, requirendum est Episcoporum omnium Provinciæ Ecclesiasticæ suffragium de Sacerdotibus singulis, qui Sedi Apostolicæ commendandi esse videntur pro novâ Episcopi electione. Quoniam verò id in Concilio Provinciali facillimè et accuratè fieri potest, si intra tres menses ab obitu Episcopi Concilium Provinciale habendum est, expectanda erit Concilii celebratio, antequàm ad commendandos Sacerdotes qui Episcopatu digni censentur, ad S. Congregationem scribatur. In Concilio autem, collatis inter se sententiis, Episcopi statuunt quos Sacerdotes S. Sedi commendent verè idoneos et de Ecclesiâ benè meritos, qui Sedes vacantes obtineant, vel Coadjutoris officium suscipiant illius Episcopi, qui auxilio Coadjutoris indigere censeatur.

Quod spectat verò ad casus quibus, prout superiùs statutum est, Concilii Provincialis celebratio non ita proxima sit, ne Sedes Episcopalis aliquandiù vacet, primùm hoc magnoperè opportunum factu est, ut singuli Episcopi litteras subscriptas et sigillo munitas, duplici exemplo, apud se habeant, quibus contineantur nomina trium saltem Sacerdotum, quos idoneos arbitrentur ad Diocesim regendam. Eæ autem litteræ ita exteriùs obsignari debent, ut adveniente Episcopi morte, Vicario Generali tradendæ esse intelligantur: Vicarius verò Generalis alterum earum litterarum exemplum ad Archiepiscopum, alterum ad propinquiorem, vel ad seniore ex duobus Episcopis propinquieribus deferendum curet. Eo litterarum exemplo accepto, Episcopus propinquior ad Archiepiscopum

scribet, suasque animadversiones adjiciet. Epistolâ Episcopi propinquieris ad Archiepiscopum delatâ, vel, si neglexerit is scribere, rationabili elapso temporis spatio, Archiepiscopus ad omnes Episcopos, ne propinquiero quidem excepto, scribet, et nomina illa cum suis animadversionibus communicabit, aliorum etiam nominibus additis, si illi quos Episcopus designaverat, Archiepiscopo idonei minimè videantur. Post acceptas Archiepiscopi litteras, omnes Episcopi ad S. Congregationem sine morâ scribent, suas sententias et suffragia de tribus illis vel sex commendatis exposituri. Vacante Sede Metropolitanâ, litteræ Archiepiscopi demortui nomina trium Sacerdotum designantis, à Vicario Generali ad Episcopum propinquierem et ad Suffraganeum Episcopum seniore mittendæ sunt; Episcopus autem senior suffraganeus faciet ea omnia quæ de Archiepiscopo superiùs statuta sunt, ubi agitur de Episcopi electione.

Quòd si apud Episcopum vel Archiepiscopum demortuum litteræ memoratæ de trium Sacerdotum designatione non reperiantur, Vicarius Generalis Episcopum propinquierem, vel seniore ex duobus propinquieribus, de eâ re certiore statim faciet, ut Episcopus propinquior tria designet Sacerdotum nomina in Epistolâ ad Archiepiscopum mittendâ. Archiepiscopus, eâ acceptâ, ad omnes Episcopos scribet, et ea omnia fient, quæ jam indicata sunt circa agendi rationem tenendam, ubi litteræ Episcopi aut Archiepiscopi Sacerdotum nomina ante mortem designantis fuerint repertæ: si Episcopus propinquior ad Archiepiscopum scribere neglexerit, Archiepiscopus ipse tria nomina Sacerdotum Suffraganeis omnibus, propinquiero non excepto, designabit. Si agatur de Archiepiscopi electione, senior Episcopus

suffraganeus faciet omnia, quæ in Episcopi electione ab Archiepiscopo facienda esse decretum est. Quod pertinet ad electionem Coadjutorum, excepto casu quo Sedes Apostolica aliâ ratione agendum esse statuerit, Episcopus qui Coadjutorem petit, nomina trium Sacerdotum Archiepiscopo et Episcopis suffraganeis significabit, supplicem libellum de eâ re ad S. Congregationem mittet, et Archiepiscopus et Episcopi S. Congregationi mentem suam de Coadjutore eligendo communicabunt.

Hæc sunt quæ in commendandis Sedi Apostolicæ Sacerdotibus pro Fœderatæ Americæ Episcoporum electione S. Congregatio servanda præscripsit. Ea verò decernens, notum omnibus esse voluit, in litteris de hac pertractantibus ad S. Sedem transmittendis nihil inveniri debere, quod electionem, nominationem, postulationem innuat, sed propriè dictam commendationem; ut etiam ex litterarum formâ pateat nullam in S. Sedem inferri obligationem eligendi aliquem ex commendatis: salva enim manere debet et illæsa Sedis Apostolicæ libertas in eligendis Episcopis. Commendationes verò lumen tantum et cognitionem S. Congregationi, non autem obligationem afferent.

Datum Romæ ex Æd. dic. Sac. Congreg. die 14 Junii 1834.

C. M. EP. PRÆNEST. CARD. PEDICINI, *Præf.*

A. MAIUS, *Secr.*



CONCILIUM

BALTIMORENSE

PROVINCIALE III,

HABITUM

ANNO 1837.